

INUIT ATAQATIGIIT

INATSISARTUNI



Nuuk 7. April 2015

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

1.

DMI-p uuliakoornissamut modeli maannakkut atugaa immap sikuanut paasissutissanik immersorneqangitsuusoq ilumoorpa? Taamaassimappat, taava uuliakoornissamut modelimut immap sikuanut tunngasut qaqugu ilanngunneqartalissappat?

2.

Uuliakoornernut qanoq ittunut modeliliortoqarsimava (soorlu uuliasiorluni qillerinernut, umiarsuarnut ajutoortunut silalluunniit pissusiinut assigiinngissitaartunut modelit eqqarsaatigalugit?) Modelit taakkua assigiinngitsut avammut saqqummiunneqassappat?

3.

Modelit taakkua siullertut upalungaarsimasunit (ajutoorneq pereerpat) atorneqassappat, imaluunniit pilersaarusiornermi aatsitassanullu ingerlassanullu annertuunut tusarniaasitsinerni aamma atorneqassappat?

4.

Upalungaarsimanerup maanna atuuttup naammanneranut naliliinissami modelit aamma atorneqassappat? Tassani sulisut atortullu – aammali atortut sumi inisisimaneri eqqarsaatigaagut (atortummi sumi tamaniinneq ajormata).

(Inatsisartuni ilaasortaq, Naaja H. Nathanielsen, Inuit Ataqatigiit)

Tunngavilersuut

Namminersorlutik Oqartussat Dansk Meterologisk Institutimut (DMI) uuliakoortoqassappat modelinut assigiinngitsunut atatillugu suleqatigiinnissamik isumaqatigiissuteqeqqammerput. Imartarput inuuniutigaarput, taamaattumillu uuliakoortoqarsinnaaneranut pinngitsoortitsisinnaaneq pingaaruinnartuuvoq. Taamaattumillu DMI-mut isumaqatigiis-sut alloriarneruvoq pitsaasoq.

Taamaattorli modelit maannakkut atuuttut immap sikuanut tunngatinneqannginnerannik tusaamasaqarnerput tupaallaatigaara. Tamanna ilumoorpat tamatuma tusagassiutitigut nalunaarummi ilanngunneqarsimannginnera tupigusuutigaara. Tassanimi soorluuna akerianik paasitinneqartugut. Uuliakoortoqassagaluarparmim immap sikua qanoq apeqqutaatigisoq nalunngilarput. Paasissutissap matuma ilumoorneranik ilumuunnginnerilluunniit paasisaqarnissarpil iluaqtaassaaq.

Tamatuma saniatigut uuliakoornernut assigiinngissitaartunut modelinut suliarineqartunut annertunerusumik paasissutissinneqarnissarpil soqutiginartuuvoq. Aasarimmi umiarsuaqqamit uuliakoornermi Avannaani qillerinerup naggataasersornerani imaani itisuumi uuliakoortoqassappat allaaneruvoq.

Apeqqutima ullut suliffiusut qulit iluanni akineqarnissaat kissaatigivara.

DMI-p tusagassiutitigut nalunaarutaanit tigulaagaq¹:

"DMI uuliakoortoqassappat minutsit 15-nit iluanni sumiiffit sorliit uuliakoornermit sunnerneqarnissaannut naliliisinnasumik modeliuteqarpoq. Kalaallit Nunaat isorartoqaaq, taamaanneranili uuliakoornerup sumiiffit annertuut siaruaaffigisinnavaai taamatullu uumasut pinngortitarlu innarlerlugit. DMI-p uuliakoortoqassappat modeliani Namminersorlutik Oqartussat annaassiniarnissamik aaqqissuussigasuarsinnaapput ajutoornerullu annikinnerpaatinissaa isumagisinaallugu. Aamma DMI Kalaallit Nunaanni silassamut, imaanut sikuanullu tunngatillugu annertunerpaamik ilisimaqartuuvoq – tassunga ilanggullugit immap sikuanut ilulissanullu ilisimasat, tassami assartuineq siullertut imaatigut ingerlanneqartarmat. Imaani silarluttumi sikup sarfamit anorimillu ingerlaartinneqarnera ilulissallu kinngullutik ersinngiusattunik iluliusangortinneqarneri ulorianartorsiortitseratarsinnaasuupput".

Naalakkersuisut tusagssiutitigut nalunaarutaannit tigulaagaq²:

"Isumaqtigiissut nuannaraara. Suliaqarfimminni DMI nukittupput, imartatsinnilu avatangiisitta qulakkeernissaanut tunngatillugu pitsaanerpaat pisariaqartivissorneqarput", Anda Uldum iluarinnilluni oqaaseqarpoq, erseqqissarpaalu uuliakoortoqassagaluarpat ajutoornerup annikinnerpaatinissaanik piareersimanissamut ilungersuullugu sulissuteqarnissaq pillugu Naalakkersuisut neriorsuutiminut isumaqtigiissutaasukkut naapertuutsitsisuuneraat erseqqissarlugu."

¹ Fuld længde: <http://www.dmi.dk/nyheder/arkiv/nyheder-2015/03/klimadata-og-vejrviden-polstrer-groenlands-miljoe/>

² Dansk: http://naalakkersuisut.gl/da/Naalakkersuisut/Nyheder/2015/03/250315_dmi
Grønlandsk: http://naalakkersuisut.gl/kl-GL/Naalakkersuisut/Pisut/2015/03/250315_dmi